

## **ODLUKA VIJEĆA (ZVSP) 2015/2007**

**od 10. novembra 2015.**

**o produženju mandata specijalnog predstavnika Evropske unije u Bosni i Hercegovini**  
VIJEĆE EVROPSKE UNIJE,

uzimajući u obzir Ugovor o Evropskoj uniji, a posebno njegov član 33. i član 31. stav 2.,  
uzimajući u obzir prijedlog Visokog predstavnika Unije za vanjske poslove i sigurnosnu  
politiku,

budući da:

- (1) Vijeće je 19. januara 2015. donijelo Odluku (ZVSP) 2015/77 o imenovanju g. Lars-Gunnara WIGEMARKA specijalnim predstavnikom Evropske unije (EUSR) u Bosni i Hercegovini. Mandat EUSR-a ističe 31. oktobra 2015.
- (2) Mandat EUSR-a trebalo bi produžiti za dodatni period od 16 mjeseci.
- (3) EUSR će provoditi mandat u kontekstu situacije koja se može pogoršati i koja bi mogla otežati ostvarenje ciljeva vanjskog djelovanja Unije kako je navedeno u članu 21. Ugovora,

DONIJELO JE OVU ODLUKU:

### *Član 1.*

#### **Specijalni predstavnik Evropske unije**

Mandat g. Lars-Gunnara WIGEMARKA kao specijalnog predstavnika Evropske unije (EUSR) u Bosni i Hercegovini se produžava do 28. februara 2017. Vijeće može donijeti odluku o ranijem završetku mandata EUSR-a na osnovu procjene Političkog i sigurnosnog odbora (PSO) i prijedloga Visokog predstavnika Unije za vanjske poslove i sigurnosnu politiku (VP).

### *Član 2.*

#### **Ciljevi politike**

Mandat EUSR-a temelji se na sljedećim ciljevima politike Evropske unije u Bosni i Hercegovini (BiH): daljem napretku u procesu stabilizacije i pridruživanja za stabilnu, održivu, mirnu, multietničku i ujedinjenu BiH koja mirno saraduje sa svojim susjedima i koja se nepovratno nalazi na putu prema članstvu u Uniji. Unija će također nastaviti podržavati provedbu Općeg okvirnog sporazuma za mir (GFAP) u BiH.

### *Član 3.*

#### **Mandat**

Kako bi postigao ciljeve politike, EUSR ima sljedeći mandat:

- (a) ponuditi savjete i pomoć Unije u političkom procesu;
- (b) osigurati dosljednost i usklađenost djelovanja Unije;
- (c) olakšati napredak u političkim, ekonomskim i evropskim prioritetima;

- (d) pratiti i savjetovati izvršna i zakonodavna tijela na svim nivoima vlasti u BiH te održavati kontakt sa vlastima i političkim strankama u BiH;
- (e) osigurati provedbu napora Unije u cijelom nizu aktivnosti u području vladavine prava i reformi sigurnosnog sektora, promovisati cjelokupnu koordinaciju aktivnosti Unije u rješavanju problema organiziranog kriminala i korupcije te pružati lokalne političke smjernice za te aktivnosti, i u tom kontekstu, prema potrebi, VP-u i Komisiji davati procjene i savjete;
- (f) pružiti podršku pojačanoj i efikasnijoj saradnji između krivičnog pravosuđa i policije u BiH;
- (g) ne dovodeći u pitanje vojni komandni lanac, ponuditi komandantu snaga EU-a političke smjernice za vojna pitanja sa stajališta lokalne politike, a posebno u vezi s osjetljivim operacijama, odnosima sa lokalnim vlastima i lokalnim medijima, savjetovati se sa komandom snaga EU-a prije političkog djelovanja koje može imati uticaj na sigurnosnu situaciju;
- (h) koordinirati i provoditi napore Unije u komuniciranju pitanja u vezi s Unijom prema javnosti u BiH;
- (i) promovisati proces integracije u EU ciljanom javnom diplomatijom i aktivnostima Unije u oblasti komuniciranja sa javnošću, koje su osmišljene kako bi se postiglo bolje razumijevanje i podrška javnosti BiH o pitanjima koja su povezana sa EU-om, uključujući angažiranje lokalnih učesnika iz civilnog društva;
- (j) doprinositi razvoju i konsolidaciji poštovanja ljudskih prava i temeljnih sloboda u BiH u skladu sa politikom ljudskih prava Unije i smjericama Unije o ljudskim pravima;
- (k) raditi s odgovarajućim tijelima BiH na njihovoj punoj saradnji sa Međunarodnim krivičnim sudom za bivšu Jugoslaviju (MKSJ);
- (l) u skladu s procesom integracije sa Unijom, savjetovati, pomagati, olakšavati i pratiti politički dijalog o potrebnim ustavnim promjenama;
- (m) održavati bliske kontakte i savjetovanja sa visokim predstavnikom u BiH i drugim relevantnim međunarodnim organizacijama koje djeluju u zemlji;
- (n) prema potrebi, pružati savjete VP-u o fizičkim ili pravnim osobama na koje bi se mogle primjenjivati mjere ograničavanja obzirom na stanje u BiH;
- (o) ne dovodeći u pitanje primjenljive lance komande, pomagati da se svi instrumenti Unije na terenu primjenjuju usklađeno radi ostvarivanja ciljeva politike Unije.

#### *Član 4.*

##### **Provedba mandata**

1. EUSR je odgovoran za provedbu mandata, djelujući u okviru ovlasti VP-a.
2. PSO održava povlaštenu povezanost sa EUSR-om i glavna je tačka EUSR-a za kontakt sa Vijećem. PSO pruža EUSR-u strateško vodstvo i političko usmjeravanje u okviru mandata, ne dovodeći u pitanje ovlasti VP-a.
3. EUSR djeluje u bliskoj koordinaciji s Evropskom službom za vanjsko djelovanje (ESVD) i njenim relevantnim odjelima.

#### *Član 5.*

## **Finansiranje**

1. Finansijski referentni iznos namijenjen pokrivanju izdataka povezanih sa mandatom EUSR-a u razdoblju od 1. novembra 2015. do 28. februara 2017. iznosi 7 600 000 EUR.
2. Rashodima se upravlja u skladu sa postupcima i pravilima koji se primjenjuju na opći budžet Unije. Učešće fizičkih i pravnih osoba u dodjeli ugovorâ o javnim nabavkama od strane EUSR-a otvoreno je bez ograničenjâ. Osim toga, pravilo o porijeklu ne primjenjuje se na robu koju kupuje EUSR.
3. Upravljanje izdacima podliježe ugovoru između EUSR-a i Komisije. EUSR za sve rashode odgovara Komisiji.

### *Član 6.*

#### **Uspostava i sastav tima**

1. EUSR-u se dodjeljuje posebno osoblje koje mu pomaže u provedbi mandata i doprinosi usklađenosti, vidljivosti i učinkovitosti općeg djelovanja Unije u BIH. EUSR je, u granicama mandata i odgovarajućih raspoloživih finansijskih sredstava, odgovoran za uspostavu tima. U tim su uključeni članovi koji su stručnjaci za pojedina politička pitanja, u skladu s potrebama mandata. EUSR o sastavu tima odmah obavještava Vijeće i Komisiju.
2. Države članice, institucije Unije i ESVD mogu predložiti upućivanje osoblja za rad sa EUSR-om. Plate takvog upućenog osoblja pokriva dotična država članica, dotična institucija Unije, odnosno ESVD. Stručnjaci koje su države članice uputile institucijama Unije ili ESVD-u također se mogu uputiti EUSR-u. Međunarodno ugovorno osoblje mora imati državljanstvo države članice.
3. Sveukupno upućeno osoblje ostaje pod upravnom nadležnošću države članice ili institucije Unije koja ga upućuje ili ESVD-a i izvršava svoje dužnosti i djeluje u interesu mandata EUSR-a.

### *Član 7.*

#### **Povlastice i imuniteti EUSR-a i osoblja EUSR-a**

Povlastice, imuniteti i dodatna jamstva potrebna za dovršetak i neometano funkcioniranje misije EUSR-a i članova osoblja EUSR-a prema potrebi se usaglašavaju sa strankama domaćinima. Države članice i ESVD u tu svrhu osiguravaju svu potrebnu podršku.

### *Član 8.*

#### **Sigurnost povjerljivih podataka EU-a**

EUSR i članovi tima EUSR-a dužni su poštovati sigurnosna načela i minimalne standarde utvrđene Odlukom Vijeća 2013/488/EU.

### *Član 9.*

#### **Pristup podacima i logistička potpora**

1. Države članice, Komisija i Glavni sekretarijat Vijeća osiguravaju EUSR-u pristup svim relevantnim podacima.
2. Delegacije Unije i/ili države članice prema potrebi osiguravaju logističku podršku u regiji.

## *Član 10.*

### **Sigurnost**

U skladu s politikom Unije o sigurnosti osoblja koje je razmješteno izvan Unije u operativnom svojstvu na temelju glave V. Ugovora, EUSR u skladu sa mandatom EUSR-a i sigurnosnom situacijom na području za koje je odgovoran preuzima sve opravdane praktične mjere za sigurnost cjelokupnog osoblja za koje je EUSR direktno odgovoran, posebno tako da:

- (a) uspostavlja poseban sigurnosni plan na temelju uputa ESVD-a koji uključuje posebne mjere za fizičku zaštitu, organizacijsku sigurnost i sigurnost postupaka, za upravljanje sigurnim kretanjem osoblja na područje za koje je odgovoran i unutar njega, kao i za upravljanje situacijama u kojima je ugrožena sigurnost te uključujući krizni plan i plan za evakuaciju;
- (b) osigurava da je cjelokupno osoblje koje je razmješteno izvan Unije pokriveno osiguranjem od visokog rizika, u skladu s uslovima na području za koje je odgovoran;
- (c) osigurava da svi članovi tima EUSR-a koji trebaju biti razmješteni izvan Unije, uključujući lokalno angažovano osoblje, dobiju odgovarajuće sigurnosno osposobljavanje prije ili nakon dolaska na područje za koje je odgovoran, na temelju stepena rizika određenog za to područje;
- (d) osigurava provedbu svih dogovorenih preporuka koje su pripremljene na temelju redovnih sigurnosnih procjena te za Vijeće, VP-a i Komisiju priprema pisane izvještaje o provedbi tih preporuka i o ostalim sigurnosnim pitanjima u okviru izvještaja o napretku i izvještaja o provedbi mandata.

## *Član 11.*

### **Izvještavanje**

EUSR redovno priprema pisane i usmene izvještaje za VP-a i PSO. EUSR također prema potrebi obavještava radne grupe Vijeća. Redovni izvještaji šalju se putem mreže COREU. EUSR može pripremati izvještaje za Vijeće za vanjske poslove. U skladu s članom 36. Ugovora, EUSR smije učestvovati u informisanju Evropskog parlamenta.

## *Član 12.*

### **Koordinacija**

1. EUSR doprinosi jedinstvu, dosljednosti i učinkovitosti djelovanja Unije i pomaže osigurati da svi mehanizmi Unije i aktivnosti država članica djeluju dosljedno kako bi se postigli politički ciljevi Unije. Aktivnosti EUSR-a se prema potrebi koordiniraju sa Komisijom, kao i sa aktivnostima ostalih specijalnih predstavnika koji djeluju u toj regiji. EUSR priprema redovne informativne sastanke za misije država članica i za delegacije Unije.
2. Na terenu održava blisku vezu sa šefovima delegacija Unije u regiji i šefovima misija država članica. Oni ulažu sve napore da bi pomogli EUSR-u u provedbi mandata. EUSR također održava kontakt sa međunarodnim i regionalnim akterima na terenu, a posebno održava blisku koordinaciju sa visokim predstavnikom u BiH.
3. U podršci operacijama Unije za upravljanje krizama, EUSR, zajedno sa ostalim akterima Unije koji su prisutni na terenu, poboljšava širenje i razmjenu informacija unutar Unije u cilju postizanja visokog stepena zajedničke informiranosti i procjene stanja.

*Član 13.*

**Pomoć u vezi sa zahtjevima**

EUSR i osoblje EUSR-a pružaju pomoć u pribavljanju elemenata za odgovor na sve zahtjeve i obveze koji proizlaze iz mandata prethodnih EUSR-ova u BiH te osiguravaju administrativnu pomoć i pristup relevantnim spisima za tu svrhu.

*Član 14.*

**Preispitivanje**

Provedba ove Odluke i njena usklađenost sa ostalim angažmanima Unije u regiji redovno se preispituju. EUSR podnosi Vijeću, VP-u, i Komisiji izvještaj o napretku do kraja juna 2016., a do kraja novembra 2016. podnosi detaljan izvještaj o provedbi mandata.

*Član 15.*

**Stupanje na snagu**

Ova Odluka stupa na snagu na dan donošenja.

Primjenjuje se od 1. novembra 2015.

Sastavljeno u Briselu 10. novembra 2015.

*Za Vijeće*

*Predsjednik*

P. GRAMEGNA